



*Dauid refuse les armures pour combattre Goliath, lequel ayant vaincu, il luy tranche la teste de son glaiue mesme.*

**L**A R M E E des Philistins estant rangée pour combattre les Israélites, és termes de Dommin, le Roy Saül assembla les hommes d'Israël, qui vinrent en la vallée du Therebinthe, & estoit vne vallée entre les deux armées. Alors se presenta Goliath de hauteur démesurée, qui estoit armé d'airain, ayant son Escuyer deuant luy, qui avec audace vint deffier les Israélites, disant : Faites combattre seul à seul vn de vos gens contre moy, & s'il me frappe, nous sommes vos seruiteurs ; & si ie suis victorieux, vous serez serfs de nous. A ces paroles fut le Roy Saül estonné, lequel fit sçauoir s'il y auoit homme qui le voulust combattre, qu'il le feroit riche, & luy donneroit sa fille en mariage, & feroit la maison de son pere sans tribut. Or Dauid qui alloit aux champs porter viures à ses freres, se presenta, & ne voulut autres armes que sa fonde & ses pierres pour combattre ce Goliath, disant à Saul ; I'ay bien tué vn Ours & vn Lyon dés ma ieunesse, ie vaincray aussi ce Goliath. Donc Dauid marcha contre son ennemy qui le méprisoit, mais ayant tourné sa fonde, luy enfonça la pierre dedans le front, & le fit tomber. Puis Dauid se iettant de vitesse sur luy, luy ôta son glaiue, duquel il luy trancha la teste.